



Senen, 05 September 2022
Ogen: Daniel 1:1-7



Kalak Si Ipilih



Sope denga Covid jadi ku bas doni enda, mbue perlumban si perlu enterem muat bagin guna ngikuti perlumban e. Gelarna pe perlumban, lit si talu lit ka si terpilih jadi pemenang. I tengah-tengah negaranta umpamana lit Indonesia Idol, Indonesi mencari bakat ras sidebanna. Persaingen si ketat erbahanca kerina peserta erusaha mereken si mejilena, si mehulina segelah jadi kalak si terpilih. Biasana si ipilih e me kalak si lit bas ia nilai lebih umpamana si mejilena, si beluhna, si disiplinna, si jujurna ras si debanna.

Aspenas isuruh raja Nebukatneser jadi sekalak si etugas guna milih kalak Jahudi si itaban ku Babilon. Kalak si ipilih enda me kari si erdahin bas istana raja. Bas pemilih e lit piga-piga syarat si ibahan e me: anak perana kesusuren raja ras bayak; arus mejile rupana, pentar, mbages pemetehna, pedas nangkap pelajaran, la lit sitik pe man pandangan bas kulana; nggit iajari segelah beluh ngoge ras nuratken cakap Babilon; pangan si man panganna seri ras pangan kalak i bas istana bage pe minem anggur; gelarna isambari jadi gelar sinuriken dewa-dewi Babilon. Lit empat anak perana si ipilih bas suku Juda nari e me Daniel, Hanaya, Misael ras Asaria. Bas istana gelar kalak enda isambari jadi Beltasar, Sadrah, Mesah ras Abednego. Ibereken waktu telu tahun guna banci latihan ras erlajar segelah kerina persyarat e si itetapken enda banci tersehi. Kenca telu tahun anak perana e ngadap ku raja segelah inilai, atan entah la atan erdahin bas istana.

Bagenda me si man dalanen guna banci jadi kalak si terpilih, maun mesui iakap, tapi erkiteken mata natap ku tujun gelah ipilih erbahanca tetap lit semangat. Kita enggo ipilih Dibata, mari cidahkan arah kegeluhenta kita enda la seri ras kalak sideban (doni enda) bas caranta rukur, erbelas (ngerana), lagu langkahta, bagepe caranta erdahin.

Teruslah mpelimbarui geluh ncidahken kita kalak si ipilih Dibata